

Gas. Tom. nr. 801 4. 10. 1968.

† Rev. Sur Giachen Antoni Fetz

Giubilar e plevon resignau



Domat/Ems piarda in de ses gronds e marcents vischins, in spiritual della veglia ed ortodoxa urdadira sacerdotala, in original sco tal el meglier senn dil plaid. Buca meins che 64 onns de sia veta sacerdotala astga il grond defunct survir a Diu, al buntadeivel e tutsavievel. Il zenn della parochiala de Domat ha venderdis vargau annunziau cun tuns dolorus, mo mischedai cun la legria pascala, la fin dil pelegrinadi terrester de rev. **Sur Giachen Antoni Fetz.** Quei zenn de miert ha anflau in eco meritau per tutta nostra tiara Svizzera entuorn, ei Sur Fetz staus in dils pli populars pasturs dellas olmas de nossa patria, senza bandiunar la via grada della doctrina de Cristus e della Baselgia, senza descender memia zun dal nivo sacerdotal ed academic.

Sur Giachen Antoni Fetz ei naschius ils 14 d'avrel 1882 a Domat el ravugl ded ina respectada e numerusa famiglia. Il Domat de lu ei buca pli; in niev Domat ei naschius. Sur Fetz ha saviu dir cun la s. Scartira: Jeu hai viu e surviviu «Nova e Vetera». Ed el selegrava, sch'ils de Domat capevan de formar ina sauna sintesa, d'exploitar il niev dil temps modern, de scaffir novas pusseivladads de lavur e gudogn, ded extender las relaziuns economicas e culturalas sur ils confins della vischnaunca, — mo era de salvar las bunas isonzas e tradiziuns localas; de salvar la fatscha dil vitg. Il spert sempel e puril dil Domat de sia affonza ha dau ad el, sper l'educaziun veramein cristiana entras ses geniturs e pasturs dellas olmas, in carisma tut aparti de saver s'occupar da scadin, da giuven e vegl, da grond e pign. El ha mantenui in saun humor sacerdotal ed in respectabel senn per la realitat della veta.

1906—1907 ad Innsbruck, ed ussa tschenta Msgr. uestg Battaglia quei beinpreparau ed iniziativ giuven spiritual el marcau grond (1907—1914). El vegn vicari della Baselgia de Nossadunna a Turitg. Ins confida beinspert a quei um da forza fisica e spirtala, agl excellent cantadur, il chor de baselgia (Gregoriuschor) ed ultra de quei aunc la pastorazion della giuventetgna. El vegn numnaus directur dil Maximilianeum igl onn 1910. Sur Fetz ei staus gl'emprem vicari cun quei uffeci. Suenter 4 onns de pensiva e stendida lavur pil Maximilianeum ha el astgau surdard ina biala summa a siu plevon, schegie ch'ins carteua che quella instituziun mondi culs peis ensi. Quei fatg han las autoritads competentas de Turitg mai emblidau ed han salvau sur Fetz tochen tier sia fossa en buna memoria.

Sur Fetz ha adina sentiu en siu cor in agen schar encrescher per sia patria grischuna e per la muntoyna insumma. Perquei surpren el igl onn 1914, all'entschatta dell'uiera mundiala, la pleiv de Caschinutta al pei dil Munt Evelin. Cheu a Caschinutta, alla bucca dil grond tunnel denter nord e sid, opereschia Sur Fetz 8 onns. Secape-scha ch'ins saveva strusch schar per adina in tal spiritual, da tala comparsa e capientscha, cun ina vusch sco ils zenns della catedrala, ell'umbriava de Caschinutta. L'armada vegn attenta sin el, numna el capitani campester, (1915—1949) ed el ei bein staus in dils pli enconuschents caplons d'armada dils davos decennis. El ei daventaus in plevon campester legendar, beinvesius dals officiers e dalla schuldada. In triep colonels-divisionaris tschercan l'amicezia ed il contact cun Sur Fetz e colonel corps-cumandant Nager resta siu fideivel amitg per veta duronta.

Igl onn 1922 ascenda Sur Fetz sin giavisch de Msgr. Georgius l'Alpsu, fiera ina liunga e stendida egliada giuaden ellas valladas grischunas, en sia patria, e seferma a Sedrun. 26 onns, ils megliers de sia veta sacerdotala, schenghegia el a quella pleiv muntagnarda. Quella fageva gia ses emprems pass al niev svilup, al turismus ed alla fatscha ded in liug de cura. Sur Fetz fuva carschius per ils novs problems, per las novas ideas, ch'ina tala atmosfera tarmetta cun la tschaghera siaden ella val alpina, schubra e se-reina. Sco paucs anfla el in bien contact cun ils jasters e dumasti, gudogna la simpatia dil pie-vil ed ei en cuort in dils ses. A Tujetsch ha Sur Fetz schau anavos bials e gronds monuments, che plaidan da sia capientscha artista, da sia ca-rezia per la casa de Diu, ed era per las capluttas, che salidan sco reginas dallas collinas e si dalla val. Sco ina guardia sin la tuor reteneva el dalla pleiv infiltraziuns nuscheivlas, sperts moderns e libertins, e sespruava dasperas de mantener ils buns usits religius dils vegls, che fladan tonta cardientscha e fidonza enten Diu. Buns usits religius, vivificai e modernisai, mantegnan e tegnan la pleiv e la vischnaunca. — Siu humor, sia hospitalitat e sia amicezia basan sin ina pietad virila e sacerdotala. Ella ha schenghegiau ad el la confidanza dil schuldaui sco dil fideivel entei-fer quels 64 onns de siu sacerdozi. Cheu steva il plevon plein humor e capientscha amiez sia muntanera, cheu viveva quei spiritual che saveva

Voluer.

Voluer.

Ses studis ha quei svegliau e talentau giuven fatg a Mustér ed a Nossadunnaun. El serenda, suenter haver aquistau la maturitat federala, a Cuera el seminari de s. Glicci. Ils 14 d'uost 1904 retscheiva el l'ordinaziun sacerdotala entras Msgr. uestg Battaglia e festivescha ils 21 d'uost sia Messa nuviala a Domat. Domat capescha de far fiasta. E quei Domat duei pli tard haver la caschun de festivar il giubileum sacerdotal de 50 onns dil primiziant de quei digie aunc dapli, schizun il giubileum de 60 onns sacerdozi sper gl'altar della parochiala. Dieus dat aunc 4 onns suren al meriteivel sacerdot sco grazia speciala per sia meriteivla lavour pastoral de sia liunga veta sacerdotala. Al giubileum sacerdotal de 50 onns fa rev. Sur canoni e regens Dr. Giusep Scheuber dil seminari de s. Glicci il priedi festiv, siu anterius conscolar. Tier il giubileum de 60 onns ascenda medemamein in bien amitg la scantschala per undrar ils merets de Sur Giachen Ant. Fetz, numnadamein msgr. uestg Hasler digl uestgiu de s. Gagl.

Vargadas las festivitads de primizia vegn Sur Fetz clamaus a Cuera sco beneficiat de s. Catrina e s. Conrad. Denteren haveva il primiziant aunc survegniu la caschun singulare de continuar ed amplificar ses studis all'universitat ded Innsbruck. El ha nezegiau pruamein quei temps surdaus ad el ed ha duvrau ses talents per applicar il contonschiu pli tard en la pastorazion dellas olmas confidadas. A Diu sulet vuleva el dar laud e honour, tenor la devisa de s. Paul (1. Tim. 1.17). Da 1904—1906 ei Sur Fetz a Cuera,

metter a pez cun in stil tut aparti cordial las pli seriusas verdads, gie schizun censuras beinduras necessarias. Cun tgei plaschher may'el en ses meglers onns cun pass guivenils, survesend mintga 'auter scalem, dalla scala della lautga, siadora, per direger siu chor ni per schar resunar sia vusch admirabla e ferma. — Per tut sia lavour pastoral, era mischedada cun enqual surpresa e crusch, sco ei descha al bien pastur, ha el astgau sentir beinenqual legria. A 4 de ses parochians ed anterius scolars ha el astgau funczionar sco bab spiritual agl altar primizial, e pliras outras messas nuvialas dils parochians de Tujetsch ha el astgau festivar cul sentiment: Jeu hai fatg mia obligaziun. Igl onn 1944 ha Msgr. uestg Dr. Christianus Caminada confidau ad el igl uffeci de vicari episcopal per la Cadi (1944—1964). In malessier ha lu sfurzau Sur Fetz ded abdicar e seretrer da sia pleiv tuatschina. Mo el va buca lunsch; el vul esser ella vischinonza de quels crazai parochians. Ell'umbriva della claustra de Mustér pren el domicil e passenta leu plirs onns de siu otium cum dignitate. Mo la finala eis el sfurzaus ded ira a casa, a Domat, en siu Domat.

La hospitalitat de Sur Fetz duront sia entira veta vegn a schar anflar el in Diu hospital e migeivel, in Diu cordial e misericordeivel, sco el ei staus duront sia veta. Ses biars amitgs sin tia-ra possien implorar da Diu la benedicziun celestrial, il sogn ruaus cun la speranza ad ina beada levada. Sur plevon, vicari episcopal e giubilar Sur Giachen Ant. Fetz rauissa en pasch. Il di della gloriosa levada s'avischina. Chr. B.

Sepultura de Rev. Sur plev. res. G. Ant. Fetz

Il riug funeral cristian cuntegn schi gronda consolaziun e lai mirar viaden ella ventira futura: Jeu creiel en la veta perpetna. — Da quella verdad havein nus puspei saviu seperschuader alla sepultura dil spiritual ed ant. plevon G. Ant. Fetz a Domat. — In grond diember de spirituels ord igl entir cantun ha dau a quei sacerdot la davosa honour, ha accompignau el al davos ruaus a s. Gion. Msgr. Josephus Hasler de s. Gagl ha celebrau la s. Messa en concelebraziun cun ils 4 feglis spirituels dil defunct. Igl uestg de Cuera ha delegau sur vicari general e prevost Msgr. L. Soliva. Las autoritads militaras ein stadas representadas entras colonel-corpscumandant Nager, brigadier Durgiai e colonel Nell da Caschinutta. Las autoritads civilas, cuss.

Dr. Darms e cuss. Dr. Tenchio, han accumpaignau il defunct alla fossa. — Al past funeral plaida rev. sur decan Placi Huonder, plevon de Sumvitg, en num dil capetel sursilvan plaids d'engraziament al defunct, ferton che rev. P. Vigeli Berther della claustra de Mustér tegn il riug funeral ella baselgia parochiala. Tujetsch ha tarmess ina gronda delegaziun cun duas bandieras alla sepultura ed aschia mussau igl engraziament agl anterius plevon. — Possi il giavisch de rev. Sur G. Ant. Fetz, exprimius alla fin de sia veta, ir en vigur: Buca fagei in grond plaid sper mia bara, mobein rughei per vengonzs spirituels pil mund futur.

Il preziau defunct sacerdot rauassi en pasch!
(Comm.)